



partii naleraq

Nuuk, 23. april 2015

Hans Enoksen

**UPA2015/36**

**Piitsuussuttip killinganik kingusinnerpaamik UPA 2016-imut atatillugu aalajangersaaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

**UPA2015/37**

**Ilaqutariit meerartallit akornanni piitsuussuseq immikkut ukkataralugu aningaasatigut naligiinnginnerup piitsuussutsillu akiorneqarnissaanut iliuusissatut pilersaarusoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut kingusinnerpaamik UKA 2016-imut atatillugu inaarsarneqareersimassaaq.**

(Inatsisartunut Ilaasortaq Aaja Chemnitz Larsen, Inuit Ataqtigiit)

### **Siullermeerneqarnera**

Inatsisartunut ilaasortaq Aaja Chemnitz Larsen Inuit ataqtigiit, Inatsisartut aalajangiiffigisasaanik marlunik siunnersuuteqarpoq tassalu piitsuussuttip killinganik Naalakkersuisut aalajangersaanissaannik, kiisalu ilaqutariit meerartallit akornanni piitsuussuseq immikkut ukkataralugu aningaasatigut naligiinnginnerup piitsuussutsillu akiorneqarnissaanut iliuusissatut Naalakkersuisut pilersaarusoqqullugit, tamannalu Partii Naleqqamiit oqaaseqarfigissavarput.

Partii Naleqqamiit inuit atugaasa assigiinnerulernissaat ilungersuullugu anguniagaraarput, ineqarnermut akiliutit appartinneqarnissaat ilungersuupparput, aamma angutserlugu ilungersussaagut, tassami takusinnaavarput ilaqutariippassuit, utoqqaat, anaanat ataatallu kisimiittut, qanoq inuuniarnikkut atorsartigisut, tassami aningaasarsiat amerlanerpaat ineqarnermut kiassarnermut qaammaqqutinullu akiliutigineqartarmata.

Nunatsinni ilaqutariit meerartallit akornanni atukkatigut naligiikkunnaariartuinnarneq ukiuni makkunani annertusiartuinnartoq takullugulu misigisimalersimavarput, ilaatigullu ilaqutariit

ajornartorsiutaat amerliartuinnarlutik annertusiartuinnarlutillu, aammalu inissaaleqineq inigisaminnillu anisitaasartut amerliartornerat ernumatigissallugu pissutissaqarpugut.

Taamatullu ingerlaannarsinnaangitsugut pingaartumik ilaqutariit meerartallit eqqarsaatigalugit Partii Naleqqamiit oqaatigissavarput.

Taakkuinnaangillat inuit akornanni pissaqarnerusut pissakinnerusullu akornanni inuttut atukkatigut pissaqarnikkullu assigiinngissuterujussuaq alliaartuinnarpoq tamannalu Partii Naleqqamiit akuersaangilluinnarparput.

Ilaqutariit meerartallit akissaatikinnerusut inuuniarnikkut atugaat oqitsuinnaangitsut aammalu ilungersunarsiartuinnartut atukkat ersarissumik takussaaleriartorput. Inigisamut akiliutit qaffakkiartuinnartut, meerartallit inigisaminniit aniatinneqartut takullugit misigalugillu oqitsuinnaangillat, susassareqatigiittullu ikioqatigiilluta pissutsit pitsaanerulernissaat angusariaqalerparput.

Taavalu meeqqat isumannaatsumik peroriartussappata aamma inuussutissaqarlutik ineqarnikkut isumannaatsumik atugassaqartitaasariaqarpugut, aammalu soorunami ulluinnarni atugaat pitsaanerulersinneqassasut sulissutigisariaqarpugut.

Meeqqat atugaasa assigiinnerulernissaat pingaartumik inuussutissaqarnikkut atisassaqarnikkullu qulakkeertariaqarpugut. Angajoqqaat akissarsiakitsut meerartallit ulluinnarni inuuniarnermikkut atugaat sukumiisumik qulaajaffigalugit inuuniarnissamut nallersuuttumik ikiorsiiffigineqarnissaat suliarisariaqarpugut.

Ineqarnikkut meeqqanut tapit nalilersoqqissaarnissaat aammalu ineqarnermut tapiissut qanoq naleqqussarneqarsinnaanersoq eqqartuiffigeqqittariaqalersoq Partii Naleqqamiit oqaatigissavarput, ilaqutariinnut meeralinnut pitsaanerusumik atugassaqarfiusinnaangorlugu.

Aammalu utoqqaat siusinaartumillu sulisinnaajunnaarnersiutillit ineqarnerminnut akiliutaat ilanngullugit aaqqissuuttariaqalerput, tassami inuuniarnikkut taakkua atugaat oqitsuinnaangillat ineqarnerminnut akiliguunik taava qaammatip naanissaanut assorujussuaq ajornartorsiuteqalereertarput allaat inuussutissaqarniarnermikkut ajorluinnartumik inissittarlutik.

Pissutsit tamakku pitsaanerulissappata, ilaatigut ikiorsiisarnermut tunngasut piaartumik suliarineqartariaqalerput, tassami inoqatigut ilaatigut aningaasarseqqinnissamik tungaanut

inuuniarnikkut aningaasaqarnikkullu ajornartorsiorujussuarternerat taamatut ingerlaannarsinnaangimmat.

Isorliunerusuni nunaqarfinnilu inuit najugallit, ilaatigullu annertuumik suliffissaaleqiffiusut, ilaatigut ilungersunartumik aningaasaqarniarnermikkut inissisimasarput, suliffissaarunnermi aningaasat ikiorsiissutit annikippallaarnerat pissutigalugu, tamannalu aamma meeqqat ilaqtariippassuillu eqqarsaatigalugit tulluannngilluinnarpoq.

Piitsuussuseq akiorneqassappat innuttaasut qaammarsaaffigineqarnissaat, suliffissaqarnissaat, ilinniarsimanissaat, ilinniartitaanermilu qaffassaaajuarnissat pinngitsoorneqarsinnaangitsut Partii Naleqqamiit oqaatigissavarput.

Kiisalu inuttut pisinnaatitaaffiit ataqinneqarnerullutik atorneqalersuuppata taava imminut pilersornikkut anguneqarsinnaagaluartut massakkut atunngilagut tamannalu ilungersunarluinnarpoq. Tassami aalisarsinnaangitsut piniarsinnaangitsut tunisisinnaangitsullu piitsuussutsimik eqqornerlunneqartarmata.

Piitsuussuseq qaangeriartorneqassappat ilaqtariillu meerartallit ingerlalluarnelussappata inuussutissarsiornikkut mattussuinerput qaangertariaqalerparput. Tassami akuersaarneqarsinnaangilaq inuit nammineerusukkaluartut periarfissaarutsillugit, taamaallaat pisortanik ikiorneqarnissaanik kaammattorutsigit ajorluinnarmat.

Piitsuussuseq akiorneqassappat, sulisinnaasut tamaasa atortariaqalerpagut, taamaaliornikkut aamma kinguariit ingerlalluarnerusinnaanerat anguneqarsinnaammat. Taamaattumik aamma inuusaatsitta allannngortinnissaanut piumassuseqarnerusariaqarpugut tassami ilinniarsimassutsikkut annertusaagutta namminneq piitsuussuseq atugarput qaangeriartorsinnaagatsigu, taamaattumik nunaqarfinni illoqarfinnilu ilinniartitaanikkut atugassarititaasut pitsanngorsartuartaqarpugut.

Kisianni aamma uagutsinnut tatiginerulissagutta taava kalaallit sulisinnaasut tamaasa atorneqarnissaat atortariaqalerparput. Kalaaleqatitta suliffissarsioraluarlutik periarfissaqartitaanatik misilittagaqanngitsutut nalilerneqartarnerat peerluinnartariaqalermmat.

Kina oqarpa misilittaqanngitsoq, nunami maani najugaqarpoq inuusaaserput nunarpullu minnerunngitsumillu inuiaqatigiit ilisimavaat oqaatsigut atorlugit sulissutissavaatigut minnerunngitsumillu nunarput inuiaallu kiffartuutissallugit, taamaattumik avataaniit tikisitanik nalikinnerusutut uagutsinnut inissittarnerput tassa tamaanga killeqartariaqalerpoq.

Piitsuussuseq oqaaseq tusarnerpallaanngikkaluartoq atorpara siunnersuuteqartup saqqummiussamini tunngavilersuinera ataqqillugu.

Kisianni tassa paasinarluarpoq atukkatsigut naligiinnerulissagutta aningaasaqarnikkut atukkat isiginngitsuusaaginnarsinnaajunnaarpagut ilagut katagarpagut pissakinnerusut pissakinneruleriartuinnarput pisuut pisuunngoraluttuinnarput taamatut ingerlaannarsinnaanngilagut atukkatigut naligiinnerulertariaqarpugut tamannalu Partii Naleqqamiit sulissutiginiarparput.

Aalajangiiffigisassamik siunnersuuteqartup tunngavilersuutai isumaqatigalugit Peqqinnissamut isumagininnermullu ataatsimiititaliami suliarineqarnissaa innersuussutigaarput.